




La casa paterna dil poet da Laax sper la via principala.



«La sera sper il lag», forsa la poesia la pli enconuschenta da Camathias, avon la scola da Laax.

FOTOS MAD

Rispostas occasiunalas restadas

Laax regorda al scribent Flurin Camathias a caschun da siu anniversari da 150 onns

DAD ANDREAS CADONAU/FMR

■ **Laax renda honor al scribent e poet indigen Flurin Camathias che nota igl onn 2021 siu 150avel anniversari. Il chor mischedau ha lantschau las emprovas per in concert commemorativ instradaus da cuminonza cun il chor viril sin il gi da naschientscha dil poet ils 6 da mars. Il concert ei sulet ina da pliras occurrenzas planisadas egl onn proxim.** «Solemn ruavs cheu silla riva, d'umbriva stat il lag curclaus...». La rema intonada da *Gion Balzer Casanova* lai buca luar sulet l'olma romontscha. «La sera sper il lag» ha fatg e fa in considerabel viadi el mund, la speciala simbiosa da musica e text fascinescha. E da tgi deriva la rema? Tier quella damonda ston ils biars probabel ceder la risposta. Igl autur Flurin Camathias ei naschius ils 6 da mars 1871 a Laax e morts igl onn 1946 a Glion. Per igl autur ei «La sera sper il lag» ina da biaras poesias, ovras intonadas da numerus cumponists: Hans Erni, Duri Sialm ed auters. Gion Deplazes numna,



Flurin Camathias (1871–1946).

en ina artechel cumpariu a caschun dil 100avel onn da naschientscha da Flurin Camathias, datier da 70 canzuns into-

nadas sin fundament dad in text dil poet da Laax. E Deplazes circumscriba igl autur da Laax: «Daventaus per la zucca il pli ferm e fritgeivel cantadur sursilvan.» In fatg che biaras cantaduras e biars cantadurs romontschs ein buca pertscharts ozilgi. Il president dalla Pro Laax, *Erwin Ardüser*, ha menziunau la preschientscha empau zuppada ch'hagi intimau la fundaziun da trer fil en guila per commemorar Flurin Camathias a caschun da siu anniversari da 150 onns. Denter auter cun in concert ils 6 e 7 da mars 2021 en scadin cass daus dil Chor mischedau e dil Chor viril Laax. Aposta per quei concert ein novas intonaziuns da remas dil poet da Laax sin rucca. Ovras cumponidas da *Gion Andrea Casanova* e *Giusep Tschuor*.

Divers arranschaments

Laax ha denton slargau il radius dallas activitads entuorn il giubileum dil poet da casa. Ils detagls ein aunc buca defini. Ardüser ha numnau la scola dil vitg che vegni a contribuir en ina moda ni l'autra.

Entretschai ein il museum e la biblioteca da Laax e medemamein separticipescha la Cularta al giubileum da Flurin Camathias. In disc cumpact cun canzuns che sebasan sin texts da Camathias ei previus ed ina scartira giubilara. Per quella ei in team d'auturas ed auturs vegnius incaricaus d'illuminar entgins aspects da veta ed ovra dil poet. Il historicher *Sandro Buchli* da Laax sefatschenta cun biografia e poetologia digl autur; la historica *Bettina Berther* persequitescha ils contacts internaziunals e la vasta corrispondenza. L'influenza da Camathias sin la canzun romontscha vegn tractada dalla musicologa *Laura Decurtins*. Ina quarta contribuziun vegn dil teolog *Ursicin G.G. Derungs*, che tematisescha la rolla da Camathias sco augsegner. Per la creaziun grafica ei *Theres Jörger* responsabla ed edius vegn il cudisch dalla Chasa editura Rumantscha.

Specialme in la vart musicala dil poet da Laax ei aunc oz buca fetg enconuschenta ed ei dat segiramein aunc da retschercar ina cauza ni l'autra. Il meina-

project Ardüser ha menziunau da gest haver retschiert da Breil in'ovra nunconuschenta che Camathias havevi scret probabel sin giavisch dad in chor. Ardüser ei dil meini ch'ei pudessi senz'uter esser ch'ina ni l'autra ovra «occasiunala» da Camathias schai aunc enzanua en in truchet sursilvan. Forsa en ils vitgs da Breil, Andiastr ni Siat, leu nua che Flurin Camathias ha passentau sia veta sco pastur dallas olmas. Gest dad Andiastr e Siat anora ha sur Flurin Camathias giu il casti dil Munt Sogn Gieri en mira. In liug ch'ha intimau el ad ina da sias ovras principalas. «Historias dil Munt Sogn Gieri» curdadas en emblidonna sco ses ulterius epos. Persuenter viva la rema ella canzun romontscha. Pér da dregg igl onn 2021 a Laax. Il Chor mischedau Laax s'entaupa per las emprovas da cant per Flurin Camathias mintgamai la gievgia allas 20.00 ella Sentupada a Laax.

Ulteriusas cantaduras ed ulterius cantadurs interessai al project ein beinvegni. Informaziuns en causa porschan il president Erwin Ardüser ni il dirigent Rest Giusep Tuor.

Furgertaxi sedistanziescha dalla comunicaziun dil spital

Il menaschi d'ambulanza ella Cadi dat da discutir

DA HANS HUONDER / FMR

■ **En ina comunicaziun dils 29 da schaner 2020 ha il Spital regional Surselva orientau davart igl avengir dil survetsch d'ambulanza ella Cadi. Tenor Furgertaxi SA ch'ha giu quell'incumbensa entochen uss ei l'informaziun buca stada correcta.** Sco quei che Furgertaxi SA communicescha hagi el visau il contract pertuccont il survetsch d'ambulanza ella Cadi la fin d'avrel 2019 per la fin d'avrel 2020. Il medem moment hagi el giavischau novas contractivas en quei connex. «Quellas ein succedidas il quart quartal 2019, denter auter cun risguard dils presidents communalas dalla Cadi.

Ils 17 da schaner 2020 han ulteriusas contractivas cul Spital regional a Glion giu liug. La direziun dil spital ha allura giu da far scleariments cuagl uffeci da sanadad chantunal. Suenter haver menau quels discuors cuagl uffeci füss in ulteriuor termin da seduta staus previus. Il di avon che la comunicaziun allas medias entras il Spital regional Surselva ei succedida ein ils resultats dils scleariments cuagl Uffeci da sanadad dil cantun Grischun

vegni comunicai a Furgertaxi per e-mail. Il di suenter allas 10.00 ei vegniu communicau a scret a Furgertaxi SA ch'ins vegli buca cuntinuar cullas contractivas davart il contract. Gnanc in'ura pli tard ei igl entir personal dil spital vegnius informaus. Cuort suenter ei la comunicaziun als mieds da massa vegnida repartida. A Furgertaxi SA ha il temps d'orientar siu personal muncau en vesta alla comunicaziun succedida fetg spert e senza haver coordinau quella.

Consequentamein han plirs collaboraturs da Furgertaxi SA stuiu intervignir ord las medias davart igl agir dil spital», scriva Furgertaxi en sia comunicaziun als mieds da massa.

Furgertaxi: «Fetg surstaus»

Plinavon puntuescha l'interpresa: «Furgertaxi SA ei fetg surstaus digl agir dalla direziun ed en special dalla CEO e dil survetsch da tgira dil spital. Quei agir succeda sin donn e cuost dils collaboraturs da Furgertaxi ed ei per la direziun da Furgertaxi inacceptabels. Furgertaxi vegn a discutir culs collaboraturs pertuccai e tschercar ina pussieivladad per in'oc-

cupaziun futura. «La soluziun ch'il spital persequitescha cul survetsch d'ambulanza ella Cadi vegn a restrenscher la segirtad dil provediment dalla populaziun, surtut duront il temps denter las stagiuns principalas.

Sin fundament dalla reducziun dalla prestaziun vegnan ils habitonts dalla part su dalla Surselva – che ston la finfinala era purtar in eventual deficit – provedi meins spert ils meins senza bia turissem. Entochen ch'in mied da transport da Glion ei el liug correspondent san 30 entochen 40 minutas passar. En cass d'in incap pli grev sco per exempel in'attacca dil cor ni ina daguota dil tschurvi, astgass quei pli probabel esser memia ditg. Plinavon vegn la soluziun avisada a caschunar pli aults cuosts el quen dil Spital regional Surselva.

En cass d'in deficit dil spital sto quella summa vegnir cuvretga dallas vischnauncas dalla Surselva. Furgertaxi less puntuar ch'il survetsch d'ambulanza entras Furgertaxi SA ei stada duront decennis in survetsch senza cuosts per vischnauncas e spital e quei cun ina prestaziun duront 365 dis e 24 uras menaschi», scriva la Furgertaxi SA.

Ich fühle, also musiziere ich.



Musizieren, ohne die Noten zu sehen: Unsere Medien machen Sehbehinderte zu Musikern. Helfen auch Sie, Musik für alle spielbar zu machen – jetzt spenden! **Spendenkonto: 80-1514-1.** Die Bibliothek für alle Sinne.



SCHWEIZERISCHE BIBLIOTHEK FÜR BLINDE, SEH- UND LESEBEHINDERTE

www.sbs.ch

